



Siverth K. Heilmann

**24. April 2019
UPA 2019/134-1**

Umiarsuarmik ilasortaammik sinersortaammik Nanortalimmiit Upernavimmut angalasoqarsinnaasunngorlugu 2020-miit ataatsimik umiarsualiisoqaqqinnissaanik sulissutteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilasortaq Aqqalu C. Jerimiassen, Atassut)

Nanortalik Upernavillu umiarsuarmik sinersortaammik kingumut tikinneqartalernissaanik Atassut-miit siunnersuut soqutiginarluinnartoq pillugu, imatut Atassut-miit oqaaseqarfigissavarput.

Qulaani illoqarfiit isorliunerusuniittut umiarsuarmik tikinneqartarunnaarmatali, innuttaasuniik maqaasineqaannarani, isumannaatsumik angallanneqarnissaq siunertaralugu tupinnangitsumik, inatsisartuni ilasortaasartuniit Atassut-miillu oqaluttarfik manna atorlugu qaqqinneqartarpoq, kiisalu § 37 apeqquteqaatitut qaqqinneqartarluni.

Atassut-ip siunnersuuteqarnermini tunngavilersuutai ersaripput, ilaatigut timmisartumut bilisit akikinnerulernissaanik neriorsuutit eqquutinnginnerat, ilaasunut kiffartuussineq ajorseriarneranik utaqqisarnerulernermillu kinguneqarput.

Nunatsinni isorartuumi umiarsuarnik marlunnik isumannaatsumillu kiffartuunneqartarsimanerput ilaasoqarfiulluartartunik puujorsimanngilarput. Sila imarlu tamatigut pitsaajuaannanngikkaluartoq, taamaattoq ornitatsinnut isumannaatsumik apuunneqartarnerput pingaarneruvoq.

Nunatsinni imaatigut angallannikkut isumannaatsumik angalasoqarnissaanik kaammattuisarnerit paasisitsiniaanerillu ikinngitsut aqusaartaraluarlugit, ajoraluartumik imarluttaqisumi sikorsuarnik allanilluunniit patsiseqarluni inuup inuuneranik ikigisassaangitsunik annaasaqareerpugut.

Umiarsuit marluugallaramik pingaartumik aasaanerani paarlakaallutik aappaa kujammukartoq aappaa avannamukartoq, aqqissuussineq suna ajorpa. Nunatsinnut takornarissat amerlisarniarneri, illoqarfinnut nunaqarfiillu tikikulaneqarnerunissaanik politikkeqarluta siunnerfeqarpugut, tamatigulli imminut ataqatigiinngitsumik ineriartortitsivugut. Timmisartumik angalanissamut sapersoqartarpoq, umiarsuarmik angalarusunnerusunik kiisalu timersortartorpasuit ilami innuttaasut assigiinngitsut atorluarusuttut kiffartuunneqarnissaat puujussanngilagut.



Aap nalunngilarput Naalackersuisuni kiffartuussinermut isumaqatigiissutissamik suliaqartoqartoq. Atassut-miilli isumaqarpugut, Naalackersuisuni itigartitsiinnarnissamik inassuteqaannarani, kukkussutigisimasagut ilinniarfigisariaqarigut innuttaasullu tusaallugit ilinniarfigalugit aaqqiiniartariaqartugut.

Sinersortaat Sarfaq Ittuk-p angeqqataanik pisaarsinnaanissaq orniginartinneqanngippat, soormi nutaamik kiffartuussinissamik isumaqatigiissusiortoqarnissaanut atatillugu, aalajangiiffigisassatut siunnersuut, Naalackersuisuniit 2020 siusigineqarpat, allannguutissamik siunnersuuteqartoqanngila.

Siunnersuut itigartiinnarneqarnissaa Atassut-miit akuersaanngilarput, isumaqarpugut ataatsimiititaliami susassaqtumi allannguummik saqqummiussisoqarnissaa siunertaralugu nalilersuineq ingerlanneqartariaqartoq.

Taamatut oqaaseqarluta Atassut-miit qularutiginngilarput, inatsisartuni Naalackersuisunilu paaseqatigiilluarnissamik anguniagaqarnerput kaammattuuteqarnerpullu akuersaarneqassasoq.

Qujanaq.